



## **DJSCOURS KHALIFATULLAH**

HADHRAT MUNIR A. AZIM (ATBA)

24 Décembre 2015  
(12 Rabi'ul Awwal 1437 AH)

(Résumé Discours)

*Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Khalifatullah (atba) fine lire Tashahhud, Ta'uz, Surah Al Fatiha, et li fine ensuite cause lors le sujet suivant : « Bane Sacrifices du Prophète (saws) et de La Première Croyante De L'Islam »:*

### **BANE SACRIFICES DU PROPHETE (SAWS) ET DE PREMIER CROYANT DE L'ISLAM**

#### **L'APPEL DU SCEAU DE BANE PROPHÈTES (SAWS) VERS ENE DIEU UNIQUE**

« Proclame fort (et ouvertement)  
bane l'ordres ki to fine recevoir et  
détourne-toi de bane idolâtres. »  
(Al-Isra 17 : 95)

Le Saint Prophète de l'Humanité, Hazrat Muhammad (saws) fine recevoir sa l'ordre divine là afin pou établir l'unicité de Dieu (d'Allah) dans lé cœur de bane dimounes. L'appel de Hazrat Muhammad (saws) à ene Dieu unique et so rejet de bane les autres divinités, ti surprendre bane Mecquois de so l'époque, malgré ki zot ti conne très bien ki dès so jeune l'âge même, zamais li



fine adore bane divinités de la Mecque, et zamais li fine offert zot bane sacrifices, et zamais li fine fer serments lors zot noms, ni li fine adore zot dans aucaine les autres façons.

Hazrat Muhammad <sup>(saws)</sup> fine publiquement condamne sa bane divinités et idoles là après ki li fine commissionné par Allah comme Messenger d'Allah et le Sceau de tous bane prophètes. Li ti pé déclaré ki bane divinités, ki bane Mecquois ti pé tellement adorés, pas ti capave faire zot ni dibien, ni ditort, et alors kan li ti pé dire sa, bane Mecquois fine oppose li. Bane Mecquois de l'époque ti perdi tout zot connexion avec tradition de Hazrat Ibrahim <sup>(as)</sup>, et de ce fait zot pas ti pé apprécié ki Hazrat Muhammad <sup>(saws)</sup> ti pé essentiellement invite zot à la religion de zot ancêtre, Hazrat Ibrahim <sup>(as)</sup>.

Pendant quelques temps, bane Mecquois fine tolère Hazrat Muhammad <sup>(saws)</sup>. Pli le temps passé, pli zot fine perdi patience et fine commence employe bane tactiques déplorable pou détruire so mission. Zot fine commence moque li. Certains ti pé dire ki li ene sorcier. Les autres ti pé dire ki li ene fou. Bane les autres, encore, ti pé pensé ki li ene poète. Petit à petit, zot fine servi bane tactiques de plus en plus rempli avec méchanceté et de plus en plus dangéré pour faire Hazrat Muhammad <sup>(saws)</sup> perdi courage, mais zot ti conné au fonds de zot ki li ti ene dimoune tout à fait admirable. Zot fine commence place lors so la route tous les jours bane obstacles, afin pou faire li ditort physiquement et zot ti pé aussi torture so bane partisans.

### **CROYANCE, PATIENCE ET PERSÉVERENCE DE KHADIJA (RA)**

Mazine impé ki l'état ene madame d'ene haut statut social ti pou senti li si bane dimoune commence traite so missié de fou ? Mais kan tous sa fine passé, au lieu ki li encolère ou perdi patience, Hazrat Khadija <sup>(ra)</sup> ti soutenir so missié et fine affirme so confiance en so mission à ene l'époque kot tous bane les autres dimoune ti pé demande Hazrat Muhammad <sup>(saws)</sup> pou prouve véracité de so bane paroles et de so la santé mentale. Khadija <sup>(ra)</sup> fine gagne de ce fait la grande faveur pou être premier dimoune, même avant tous bane z'hommes pou accepter mission du prophète <sup>(saws)</sup> et li fine montré so fidélité en tant ki musulman jusqu'à la fin de so la vie lors la terre.

Kan Hazrat Muhammad <sup>(saws)</sup> fine rentre kot li blessé et rempli avec di sang, Hazrat Khatija <sup>(ra)</sup> fine console et soigne so bane blessures. Li fine enlève la poussière de so figure, fine lave so lipié rempli avec di sang et fine continué rassure li: « *Zamais Allah pou déshonore toi !* »

Li ti pé dire ki celui ki ena le Soutien d'Allah (swt) péna narien à craindre de quiconque ou de quoique ce soit. Avec ene tel soutien et bane tels soins, la résolution de Hazrat Muhammad <sup>(saws)</sup> fine rétablie et so confiance en so mission fine renforcé. Li fine commence so mission sak matin avec ene l'esprit neuf. Li fine ignore bane mauvais dimoune de parmi so peuple et li fine contigié accomplir so travail, couma Révélation Divine ti pé dicté li pou faire.

## PROCLAMATION DU MESSAGE ET BANE ÉPREUVES

**« Proclame fort (et ouvertement) bane l'ordres ki to fine recevoir et détourne-toi de bane idolâtres. »** (Al-Isra 17 : 95)

Hazrat Muhammad <sup>(saws)</sup> ti ena l'habitude pou alle dans bane l'endroits publiques dans Makkah pou ki li capave prêche l'unicité d'Allah. Et régulièrement li ti pé gagne maltraité physiquement et aussi verbalement. Ene fois, pendant ki li ti pé prié dans Ka'aba, Abu Jahl et détrois de so bane camarades fine amène bane tripes d'ene chameau sacrifié et fine jette sa lors lé dos de Hazrat Muhammad <sup>(saws)</sup> kan li ti pé prosterné.

C'est Uqbah ibn Abi Mu'ayt ki fine accompli sa mauvais action là. Kan ene kikaine fine informe la famille de Hazrat Muhammad <sup>(saws)</sup> de saki fine passer, so tifille Fatima <sup>(ra)</sup>, ki ti encore ene zenfant à sa l'époque là, fine galoupé dépi so la caze et fine retire sa bane tripes chameau là dépi lédos so papa.

Sa prouvé ki au fur et à mesure ki le message de *Tawhid* ti pé répanne partout, bane Mecquois ti pé vine de plus en plus frustré, agacé, énervé et bien mauvais.

Ene de bane plus grands opposants de Hazrat Muhammad <sup>(saws)</sup> et ki ti bien dangéré ti so chacha Abu Lahab. La caze de Abu Lahab ti bien près avec la caze de Hazrat Muhammad <sup>(saws)</sup> et de Khadija <sup>(ra)</sup>. Madame de Abu Lahab, Umm Jamil, ti habitié ramasse bane branches rempli avec piquants et ti pé mette sa tous les jours lors chemin de Hazrat Muhammad <sup>(saws)</sup>. Abu Lahab ti pé jette aussi so bane saletés devant la porte de la caze de Hazrat Muhammad <sup>(saws)</sup>. Khadija <sup>(ra)</sup>, so bane tiffilles et zot bane servantes ti pé bizin nettoye régulièrement zot l'entrée. Hazrat Muhammad <sup>(saws)</sup> ti pé alle cause avec Abu Lahab dans ene bon façon pou ki li comporte li comme ene bon voisin, mais so bane paroles fine alle dans vide couma dire de l'eau lors brède songe. So chacha fine persisté pou manifester so méchanceté envers so neveu et so bane familles et suivants.

### LE ROLE IMPORTANT DE KHADIJA (RA) DANS L'HISTOIRE DE L'ISLAM

Dans bane telles circonstances, Hazrat Khadija <sup>(ra)</sup> et bane les autres membres de la caze du Saint Prophète <sup>(saws)</sup> fine joué ene rôle important dans le soutien de Hazrat Muhammad <sup>(saws)</sup>. Hazrat Khadija <sup>(ra)</sup> ti continuellement à so service. Li ti pé cuit et servi li personnellement.

Fine rapporté ki ene jour ange Jibril <sup>(as)</sup> fine rende visite à Hazrat Muhammad <sup>(saws)</sup> kan li ti avec Hazrat Khadija <sup>(ra)</sup> et ki Hazrat Khadija <sup>(ra)</sup> ti pé amène manger pou li <sup>(saws)</sup>. Hazrat Jibril <sup>(as)</sup> fine dire Hazrat Muhammad <sup>(saws)</sup> pou salué Hazrat Khadija <sup>(ra)</sup> de la part d'Allah et de so part aussi (c.à.d, de Hazrat Jibril), et pou promette li (Hazrat Khatija) ene palais de perles dans Paradis, kot pas pou ena ni tapaze ni difficultés. (Bukhari)

Sa promesse ki li pou gagne ene palais de perles dans Paradis, c'est parski Hazrat Khadija <sup>(ra)</sup> fine dépasse tous dimounes en répondant à l'appel de Hazrat Muhammad <sup>(saws)</sup>. Allah fine aussi promette li ene l'endroit kot pas pou ena aucaine tapaze et aucaine difficultés parski li fine fer tout pour le tout pour ki la vie du prophète <sup>(saws)</sup> et so mission ena la paix et sans problème.

Fine rapporté même ki Hazrat Aisha <sup>(ra)</sup> fine dire ki li pas jalouse aucaine bane les autres épouses de Hazrat Muhammad <sup>(saws)</sup> excepté Hazrat Khadija <sup>(ra)</sup>, même si Hazrat Khadija <sup>(ra)</sup> fine fini mort avant même ki Hazrat Aisha <sup>(ra)</sup> marié avec Hazrat Muhammad <sup>(saws)</sup>. Raison de sa, c'est parski Hazrat Muhammad <sup>(saws)</sup> ti pé cause beaucoup à propos Hazrat Khadija <sup>(ra)</sup> et li ti pé souvent mazine li. Hazrat Aisha <sup>(ra)</sup> fine raconté également ki Allah (swt) fine ordonne Hazrat Muhammad <sup>(saws)</sup> pou promettre à Hazrat Khadija <sup>(ra)</sup> ki li pou gagne ene palais de perles dans Paradis.

Fine rapporté ki Hazrat Khadija <sup>(ra)</sup> ti exprime so désir pou marié avec Hazrat Muhammad <sup>(saws)</sup> en sa bane paroles là: « *Ô cousin, mo envie marier avec toi à cause de nous bane liens familiale, (à cause) de to bon réputation parmi bane dimounes, de to véracité, de to bane bons manières et de to l'honnêteté.* »

Hazrat Khadija <sup>(ra)</sup> ti impressionnée depuis le début par so excellent caractère. So bane impressions ki li ti ena lors Hazrat Muhammad <sup>(saws)</sup> au commencement fine confirmé par la suite kan li fine commence vivre avec li lors ene baze quotidien. Par conséquent, li ti grandement motivé pour aide Hazrat Muhammad <sup>(saws)</sup> dans tous bane façons possibles.

### **BANE MECQUOIS FINE RODE ENLÈVE LA PAIX FAMILIALE DU PROPHÈTE <sup>(SAWS)</sup>**

Kan bane Mecquois fine rende zot compte ki Hazrat Muhammad <sup>(saws)</sup> ti pé passe so lé temps pou répandre Le Message et ki de plus en plus de bane dimounes ti pé réponde à so l'appel, zot fine comploter afin pou brise la paix ki ti ena dans so la caze afin pou arrête li dans so mission. Ene de bane tiffilles du Saint Prophète <sup>(saws)</sup>, Zaynab, ti marié avec Abu Al-As ibn Rabi. Ruqqayah et Umm Kulthum ti marié à bane garçons de Abu Lahab, mais zot la vie mariage pas ti encore commencé parski zot ti encore mineures (zot pas ti encore atteindre l'âge de puberté). Bane opposants de Hazrat Muhammad <sup>(saws)</sup> fine mette pression lors so bane zannes pou divorce de so bane tiffilles et zot fine dire sa bane garçons là ki zot pou capave, en retour, marier avec bane tiffilles de la Mecque de zot choix. Abu Al-As, le mari de Zaynab, fine rejette sa proposition là (li pas fine divorce so madame).

Mais de l'autre côté, bane garçons de Abu Lahab fine divorce de Ruqqayah et Umm Kulthum. Sa ti bizin porte ene coup dur dans la famille de Hazrat Muhammad <sup>(saws)</sup>. Bane Mecquois ti oulé donne li ene leçon afin ki li abandonne so *Dawa*, mais au lieu de sa, sa ti ene bénédiction pour la famille de Hazrat Muhammad <sup>(saws)</sup> parski so bane tiffilles fine libéré de bane idolâtres et de bane opposants de L'Islam (Abu Lahab et so bane garçons) avant même ki zot vies mariage commencer.

Tentative pou détruire la paix de Hazrat Muhammad <sup>(saws)</sup> kot li fine raté. Peu après ki bane garçons d'Abu Lahab fine divorcé de Ruqqayah et Umm Kulthum, Uthman ibn Affan <sup>(ra)</sup> fine demande la main de Ruqqayah. Uthman <sup>(ra)</sup> fine marié également avec Umm Kulthum par la suite (après la mort de Ruqqayah). Allah (swt) ti destine le déshonneur pour Abu Lahab et so bane garçons.

Uthman <sup>(ra)</sup>, d'ene l'autre côté, ti parmi bane Compagnons béni de Hazrat Muhammad <sup>(saws)</sup>. Li ti parmi bane premiers convertis à l'Islam. Abu Bakr <sup>(ra)</sup> ti introduire li le Message de Hazrat Muhammad <sup>(saws)</sup> kot li fine prêche l'Islam avec Uthman <sup>(ra)</sup>, et Uthman <sup>(ra)</sup> fine réponde très vite à l'invitation de Hazrat Abu Bakr <sup>(ra)</sup> et fine joine rangs de bane *Al-Sabiqoon al-Awwalun*, c.à.d, bane premières dimounes ki fine réponde à l'appel de Hazrat Muhammad <sup>(saws)</sup> pour le monothéisme (adoration ene sel Bondié).

Bane sentiments fraternels et bane affinités ki Hazrat Muhammad <sup>(saws)</sup> et Hazrat Uthman <sup>(ra)</sup> ti ena l'un envers l'autre fine augmenter encore après la conversion de Uthman <sup>(ra)</sup> et Hazrat Muhammad <sup>(saws)</sup> fine accepter au nom de Ruqqayah la proposition de mariage de Uthman. Li ti ene Mecquois riche connu pour so modestie et so bane manières humbles. Ruqqayah ti également béni d'ene grand beauté et d'ene caractère noble. Zot ti béni et considéré comme ene beau couple.

Abu Lahab et so bane garçons ti pensé ki zot fine porte ene coup à la mission de Hazrat Muhammad <sup>(saws)</sup> en divorçant de so bane tiffilles. Mais mission de Hazrat Muhammad <sup>(saws)</sup> ti bizin continuer. Quant à so bane tiffilles, Allah (swt) fine ena bane meilleurs plans pour zot.

## LA MORT DE BANE GARÇONS DU PROPHETE ET BANE CRITIQUES CONTRE LI

La perte d'ene zenfant li certainement pas facile. Affecté par la mort de so bane garçons et par la réponse de bane Mecquois contre li, Hazrat Muhammad <sup>(saws)</sup> fine passe dans double chocs. C'est dans sa bane circonstances là ki Surah *Al-Kawthar*, le 108<sup>ème</sup> chapitre du Quran, fine révélée:

**« En vérité, Nous fine comblé toi de bane faveurs (*al-Kawthar*). Donc prié to Maître et sacrifié avec humilité! C'est to l'ennemi ki pou, en vérité, privé de descendance (*Abtar*). »** (Al-Kawthar 108 : 2-4)

En révélant sa Surah là, Allah (swt) fine console Hazrat Muhammad <sup>(saws)</sup> et so famille. Zot fine rassuré pou conné ki c'est Hazrat Muhammad <sup>(saws)</sup> ki pou recevoir bane dibiens abondants et ki c'est so bane adversaires ki en fait pas pou laisse traces et ni sa bane là pou recevoir kit éloge dans l'histoire. Par conséquent, Allah ti décrété ki bane ki ti insulté Hazrat Muhammad <sup>(saws)</sup> ki li pas ena aucaine descendance masculin, sa bane même dimounes là fine trouve la mort pendant Bataille de Badr, et dans l'histoire zot pou seulement être connu couma bane mauvais

dimounes. Hazrat Muhammad <sup>(saws)</sup> et so famille, d'ene côté, fine immortalisé dans l'histoire de l'humanité, et de l'Islam en particulier.

Destinée pou vine ene madame important dans l'histoire de l'humanité, Hazrat Khadija <sup>(ra)</sup> fine bizin passe par beaucoup de bane épreuves, dans bane circonstances de plus en plus dures, mais li fine reste remarquablement patient et rempli de grâce en faisant face à tous sa bane difficultés là.

## L'ÉMIGRATION EN ABYSSINIE

Kan bane situations fine vine trop difficiles pour certains membres de sa nouvo communauté là, Hazrat Muhammad <sup>(saws)</sup> fine conseille so bane suivants pou émigrer en Abyssinie. Le Négus d'Abyssinie à sa époque là, ti connu pour être ene dirigeant juste qui habitué protège bane sujets de son royaume de toutes sortes de bane injustices. Hazrat Muhammad <sup>(saws)</sup> et Hazrat Khadija <sup>(ra)</sup> ti bien chagrin kan bane dimounes ti pé bizin quitte zot la caze et ti pé rétabli zot dans l'Abyssinie. Zot fine même bizin séparer de zot propre tiffille, Ruqqayah, et de so missié, Uthman ibn Affan <sup>(ra)</sup>. Missié-Madame fine soulagé de bane difficultés kan zot fine arrive dans l'Abyssinie après avoir ki zot fine suivre directive du Saint Prophète, Hazrat Muhammad <sup>(saws)</sup>. Zot ti enfin en sécurité et libres pou pratique zot la foi. Ruqqayah ti bien jeune à sa l'époque là. So départ de la Mecque ti ene l'autre épreuve pour Hazrat Khadija <sup>(ra)</sup>, mais li fine supporte sa avec patience.

Pour contrecarrer mission de Hazrat Muhammad <sup>(saws)</sup>, bane Mecquois fine élabore toutes sortes kalité bane plans pour arrête l'étendue de l'Islam, mais selman tous sa bane plans là fine floppe. Pli zot ti pé oppose zot à l'Islam, pli l'Islam ti pé répanne.

## BOYCOTT SOCIO-ÉCONOMIQUE

Bane adversaires de Hazrat Muhammad <sup>(saws)</sup> fine rassemblé encore pour discute de zot bane futurs plans d'action. Li ti évident pou zot ki touye Hazrat Muhammad <sup>(saws)</sup> pas ti ene option parski sa ti pou entraîné ene bain de sang entre bane clans de bane Qurayshites. Zot fine trouve ene nouvo l'idée pou mette pression lors bane Banu Hashim et bane Banu Muttalib ki ti faire serment pou protège Hazrat Muhammad <sup>(saws)</sup>. Zot fine prépare ene l'accord pou force tous bane Mecquois pou boycotte bane membres de bane Banu Hashim et de bane Banu Muttalib. Aucaine de bane Mecquois pas ti gagne droit maintenir bane liens socio-économique avec sa deux familles là. En plus de sa, zot pas fine prend compte l'offre de paix de bane Banu Hashim. Bane clauses de sa l'accord fine metté en écrit et fine posté lors Ka'aba. Abu Talib et bane les autres membres de bane Banu Hashim et de bane Banu Muttalib fine forcé sorti de la Mecque et zot fine alle dans ene vallée aux environs de la grotte de Hira, près de Makkah. Sa vallée là li plus connu couma *Shi'b Abi Talib*, ou même *Shi'b Bani Hashim* parski sa la terre là ti propriété de bane Banu Hashim.

## KHADIJA (RA) EN ÉXILE À SHI'B ABI TALIB ET SO LA MORT

Hazrat Khadija <sup>(ra)</sup> ti rejoindre Hazrat Muhammad <sup>(saws)</sup> et bane les autres membres de bane Banu Hashim et Banu Muttalib dans sa exile là. Sa ti probablement phase de la vie ki ti pli difficile pour sa madame ki fine conne lézance (le confort et la richesse) depuis so l'enfance. So papa ti ene commerçant riche, et pareille pou so deux missiés ki li ti marié avant ki li marié avec Hazrat Muhammad <sup>(saws)</sup>.

Li ti hérite ene grande fortune de sakaine d'entre zot. So capital et le volume de commerce ki li ti possédé ti dépasse celui de tous bane commerçants de la Mecque.

Quant li fine reconnaite la Lumière Divine ki ti pé briyé lor le Choisi d'Allah, li fine accepter pou donne tout dans le chemin de sa même Allah ki Miséricordieux. Li fine sacrifié même so lé temps, so l'énergie et li fine bizin passe par plusieurs épreuves pour la cause de L'Islam. Le boycott de trois ans ki bane Mecquois fine force lors le prophète et so famille fine porte ene coup de grâce lors l'épouse du prophète et le premier musulman, ki li de côté missié et madames tous les deux. Li fine mort matériellement pauvre mais éternellement riche spirituellement. So nom et so mémoire pou toujours vivants lors la lèvres et l'esprit de bane musulmans, parski so la vie et so sacrifie et so dévotion envers Allah et le Prophète d'Allah <sup>(saws)</sup> pou reste toujours comme ene l'exemple parfait pour bane dimounes à venir jusqu'au jour du jugement dernier.

Ki Allah toujours satisfait de li et accorde li bane meilleurs bienfaits de l'au-delà ainsi ki So l'amour et So miséricorde. *Amine, Thumma, Amine*. Et ki le meilleur de bane salutations et de bane bénédictions divines zot éternellement lors le Sceau de tous bane prophètes, Hazrat Muhammad <sup>(saws)</sup>, dans sa lé monde là et dans *Aakhérat*.